

Sel. P.U. 51.

AKTA KERAJAAN TEMPATAN 1976

UNDANG-UNDANG KECIL TANAH PERKUBURAN ISLAM (MAJLIS PERBANDARAN PETALING JAYA) 2005

SUSUNAN UNDANG-UNDANG KECIL

BAHAGIAN I

PERMULAAN

Undang -
Undang
Kecil

1. Tajuk ringkas dan permulaan kuat kuasa
2. Pemakaian
3. Tafsiran

BAHAGIAN II

PENGGUNAAN TANAH PERKUBURAN

4. Kelulusan bertulis
5. Penggunaan tanah perkuburan
6. Pengebumian mayat
7. Tiada binaan atau perhiasan
8. Daftar
9. Kuasa melantik penggali-penggali kubur,dsb
10. Pengecualian
11. Kuasa Pentadbir
12. Pembawaan mayat-mayat ke tanah perkuburan

BAHAGIAN III

PENGUATKUASAAN

13. Kuasa penangkapan
14. Kuasa menyita

BAHAGIAN IV

AM

Undang -
Undang
Kecil

15. Penalti am
16. Pendakwaan
17. Pengkompaunan kesalahan
18. Fi dan caj
19. Kuasa pegawai polis di bawah Undang-Undang Kecil ini
20. Pembatalan dan peruntukan peralihan

AKTA KERAJAAN TEMPATAN 1976

**UNDANG-UNDANG KECIL TANAH PERKUBURAN ISLAM
(MAJLIS PERBANDARAN PETALING JAYA) 2005**

PADA menjalankan kuasa-kuasa yang diberikan oleh seksyen 98 Akta Kerajaan Tempatan 1976 [Akta 171], Majlis Perbandaran Petaling Jaya membuat, dan menurut seksyen 103 Akta tersebut, Pihak Berkuasa Negeri mengesahkan undang-undang kecil yang berikut:

BAHAGIAN I

PERMULAAN

Tajuk ringkas dan permulaan kuasa

1. (1) Undang-Undang Kecil ini bolehlah dinamakan **Undang-Undang Kecil Tanah Perkuburan Islam (Majlis Perbandaran Petaling Jaya) 2005**.
- (2) Undang-Undang Kecil ini hendaklah mula berkuasa pada 1 Januari 2006.

Pemakaian

2. Undang-Undang Kecil ini hendaklah terpakai hanya bagi kawasan Majlis Perbandaran Petaling Jaya.

Tafsiran

3. Dalam Undang-Undang Kecil ini melainkan jika kandungan ayatnya menghendaki makna yang lain—

“Majlis” ertinya Majlis Perbandaran Petaling Jaya;

“pengebumian” ertinya mengebumikan mayat orang Islam;

“Pentadbir” ertinya seseorang yang diberi kuasa secara bertulis oleh Yang Dipertua untuk menjaga tanah perkuburan dan untuk menjalankan tugas di bawah Undang-Undang Kecil ini;

“perhiasan” ertinya apa-apa batu nisan, alat, bahan, bunga, ranting, pokok atau apa-apa benda lain yang ditanam, digantung, ditabur atau diletakkan di atas tanah perkuburan;

“rangka bina” termasuklah apa-apa rumah, pondok, bangsal kepunguan berbumbung, dinding, pagar, bingkai, pilar, pagar pancang dan papan dinding;

“tanah perkuburan” ertinya tanah perkuburan yang disediakan bagi orang Islam di kawasan Majlis Perbandaran Petaling Jaya menurut subseksyen 94(1) Akta Kerajaan Tempatan 1976;

“Yang Dipertua” ertinya orang yang pada masa itu menjalankan kewajipan-kewajipan jawatan Yang Dipertua Majlis Perbandaran Petaling Jaya.

BAHAGIAN II

TANAH PERKUBURAN

Kelulusan bertulis

4. (1) Tiada seorang pun dibenarkan mengebumikan mayat tanpa terlebih dahulu mendapat kelulusan bertulis daripada Pentadbir.

(2) Permohonan mengebumikan mayat hendaklah dibuat di dalam borang yang ditentukan oleh Pentadbir. Permohonan tersebut hendaklah dibuat oleh—

- (a) waris-waris atau mana-mana keluarga yang terdekat dengan simati; atau
- (b) mana-mana orang yang diberi kuasa secara bertulis untuk membuat permohonan oleh waris-waris atau mana-mana keluarga yang terdekat dengan simati.

Penggunaan tanah perkuburan

5. (1) Tanah perkuburan ini hendaklah digunakan bagi maksud pengebumian dan hendaklah dibahagikan kepada petak-petak kubur.

(2) Petak-petak tersebut hendaklah dinomborkan berturut-turut dan ditandakan di atas suatu pelan yang hendaklah disimpan di pejabat Pentadbir.

(3) Sebarang penempahan atau pemilihan petak-petak untuk pengebumian adalah tidak dibenarkan.

(4) Saiz bagi tiap-tiap petak hendaklah berukuran 2.4 meter panjang dan 1.2 meter lebar dan semua kubur hendaklah digali sedalam tidak kurang dari 1.5 meter di bawah permukaan tanah.

Pengebumian mayat

6. (1) Tanah perkuburan ini boleh digunakan bagi tujuan pengebumian pada bila-bila masa diperlukan.

(2) Tiada seorang pun boleh mengebumikan lebih daripada satu mayat di dalam satu petak.

(3) Pentadbir boleh, dengan budi bicaranya, mengecualikan perjalanan kuat kuasa Undang-Undang Kecil ini dalam kes-kes khas setelah merujuk kepada pegawai kesihatan dan tertakluk kepada apa-apa arahan munasabah yang dibuat oleh pegawai kesihatan bagi maksud mencegah bahaya kepada kesihatan awam.

Tiada binaan atau perhiasan

7. (1) Tiada monumen, batu nisan, kepingan bertulis, memorial, monumen bertulis, rangka bina atau perhiasan boleh dibina di atas mana-mana bahagian tanah perkuburan melainkan dengan kelulusan bertulis Pentadbir.

(2) Pelan-pelan bagi kesemua monumen, batu nisan, kepingan bertulis, memorial, monumen bertulis, rangka bina atau perhiasan yang tersebut dalam perenggan (1) hendaklah dikemukakan kepada pentadbir untuk kelulusannya sebelum pembinaan.

(3) Walau apapun peruntukan perenggan (1), apa-apa perhiasan bolehlah secara sementara diletakkan, didirikan, digantungkan, ditanamkan atau disandarkan di mana-mana bahagian kubur selepas pengebumian, upacara atau penziarahan.

Dengan syarat bahawa pentadbir boleh pada bila-bila masa mengubah, memungut atau melupuskan perhiasan sedemikian itu.

(4) Pentadbir boleh menurunkan atau mengubah apa-apa monumen, batu nisan, kepingan bertulis, memorial, monumen bertulis, rangkabina atau perhiasan yang telah dibina atau diletakkan di tanah perkuburan tanpa mendapat kelulusan bertulisnya.

Daftar

8. (1) Pentadbir hendaklah menyimpan atau menyebabkan disimpan suatu daftar yang hendaklah dimasukkan ke dalamnya—

- (a) nombor siri petak di mana simati dikebumikan;
- (b) tarikh pengebumian;
- (c) nama, nombor kad pengenalan, tempat tinggal, pekerjaan, umur, jantina dan taraf perkahwinan simati;
- (d) tarikh kematian simati;
- (e) nama, nombor kad pengenalan dan alamat orang yang memohon kelulusan bertulis di bawah Undang-Undang Kecil 4;
- (f) sebab-sebab kematian simati;
- (g) nombor rujukan kelulusan bertulis yang dikeluarkan di bawah Undang-Undang Kecil 4.

(2) Pentadbir boleh membenarkan orang ramai memeriksa daftar itu dan membuat salinan-salinannya atau cabutan-cabutannya darinya dengan bayaran fi sebanyak dua ringgit bagi setiap satu salinan.

Kuasa melantik penggali-penggali kubur, dsb

9. Pentadbir hendaklah menyimpan dan menyenggarakan tanah perkuburan ini dalam keadaan baik dan hendaklah dengan kelulusan Yang Dipertua melantik penggali-penggali kubur dan kakitangan-kakitangan lain yang perlu untuk penjagaan dan penggunaan tanah perkuburan dan boleh membayar mereka gaji-gaji dan elaun-elaun seperti Yang Dipertua fikir wajar.

Pengecualian

10. Pentadbir boleh dalam mana-mana kes tertentu mengecualikan mana-mana peruntukan Undang-Undang Kecil ini sebagaimana yang difikirkan patut.

Kuasa Pentadbir

11. Pentadbir boleh menurut budi bicaranya membatalkan atau enggan memberikan sebarang kelulusan tanpa memberi apa-apa sebab.

Pembawaan mayat-mayat ke tanah perkuburan

12. Pentadbir boleh membuat perkiraan seperti yang difikirkan patut bagi menyenangkan pembawaan mayat-mayat dari tempat kematian kepada tanah perkuburan itu.

BAHAGIAN III

PENGUATKUASAAN

Kuasa penangkapan

13. (1) Yang Dipertua atau mana-mana pegawai diberi kuasa boleh menangkap tanpa waran mana-mana orang—

- (a) yang semunasabinya dipercayai olehnya telah melakukan suatu kesalahan di bawah Undang-Undang Kecil ini; atau
- (b) yang enggan memberikan nama dan alamatnya apabila diminta atau jika ada sebab untuk meragui ketepatan nama dan alamat yang diberikan.

(2) Seseorang yang ditangkap di bawah Undang-Undang Kecil ini hendaklah dibawa ke balai polis dan hendaklah dibawa ke hadapan seorang Majistret dalam masa dua puluh empat jam, melainkan jika sebelum dari masa itu nama dan kediamannya yang sebenarnya telah dapat ditentukan, dan dalam hal yang sedemikian orang itu hendaklah dilepaskan dengan serta-merta apabila dia menyempurnakan suatu bon untuk hadir di hadapan seorang Majistret jika dikehendaki sedemikian.

(3) Apabila mana-mana orang sedemikian dibawa ke hadapan seorang Majistret, Majistret itu boleh sama ada menghendaki dia menyempurnakan suatu bon, dengan atau tanpa penjamin untuk hadir di hadapan seorang Majistret sekiranya dikehendaki, atau boleh memerintahkan supaya dia ditahan dalam jagaan sehingga dia dapat dibicarakan.

Kuasa menyita

14. (1) Mana-mana pegawai Majlis diberi kuasa boleh menyita atau mengalihkan apa-apa barang atau benda yang menyalahi Undang-Undang Kecil ini dengan risiko ditanggung oleh pemunya.

(2) Apa-apa benda atau barang yang disita di bawah perenggan (1) ini adalah daripada jenis yang mudah rosak atau yang mengikut sifatnya lekas rosak atau jika penjagaan benda atau barang itu melibatkan perbelanjaan dan kesusahan yang tidak munasabah atau dipercayai akan membahayakan orang ramai, pegawai diberi kuasa boleh mengarahkan supaya benda atau barang itu dilupuskan mengikut cara yang ditentukan oleh Majlis.

(3) Mana-mana orang yang menuntut apa-apa benda atau barang selain benda atau barang yang disita di bawah perenggan (2), boleh menuntut benda atau barang tersebut daripada Majlis dalam tempoh minima tujuh hari bekerja atau maksima satu bulan dari tarikh benda atau barang itu disita tertakluk kepada apa-apa syarat dan pembayaran yang dikenakan oleh Majlis.

(4) Yang Dipertua atau mana-mana pegawai diberi kuasa secara bertulis olehnya tidaklah bertanggungan kepada mana-mana orang bagi apa-apa kemerosotan, walau apa pun sebabnya, dalam kualiti apa-apa benda atau barang yang disita di bawah Undang-Undang Kecil ini.

BAHAGIAN IV

AM

Penalti am

15. Seseorang yang melakukan suatu kesalahan di bawah Undang-Undang Kecil ini yang baginya tiada penalti diperuntukkan dengan nyata boleh, apabila disabitkan didenda tidak melebihi dua ribu ringgit atau di penjara selama tempoh tidak melebihi satu tahun atau kedua-duanya, dan dalam hal sesuatu kesalahan yang berterusan boleh sebagai tambahan didenda yang tidak melebihi dua ratus ringgit bagi setiap hari kesalahan itu terus dilakukan.

Pendakwaan

16. Tiada pendakwaan boleh dimulakan terhadap kesalahan di bawah Undang-Undang Kecil ini kecuali oleh atau dengan keizinan Pendakwa Raya.

Pengkompaunan kesalahan

17. (1) Yang Dipertua, Setiausaha atau Pegawai Undang-Undang Majlis boleh dengan keizinan Pendakwa Raya mengkompaunkan mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan

yang boleh dikompaunkan dengan membuat suatu tawaran bertulis kepada orang yang disyaki telah melakukan kesalahan itu untuk mengkompaunkan kesalahan itu apabila dibayar kepada Yang Dipertua sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa-apa tempoh lanjutan sebagaimana yang dibenarkan oleh Yang Dipertua atau Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika suatu kesalahan telah dikompaunkan di bawah perenggan (1), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun telah dibuat dan apa-apa benda yang disita berkaitan dengan kesalahan itu hendaklah dilepaskan, tertakluk kepada apa-apa terma dan syarat yang ditetapkan.

(4) Kesemua wang yang diterima di bawah Undang-Undang Kecil ini hendaklah dibayar kepada Kumpulan Wang yang diwujudkan di bawah mana-mana Undang-Undang yang berhubung dengan Kerajaan Tempatan.

Fi dan caj

18. (1) Fi dan caj bagi setiap pengebumian (termasuk kos bagi menggali dan menutup semula kubur) ialah sebanyak RM150.00 untuk orang dewasa serta RM100.00 untuk kanak-kanak di bawah umur 12 tahun dan hendaklah dibayar kepada dan dikutip oleh Pentadbir.

(2) Pentadbir boleh, setelah berpuas hati bahawa si mati tidak meninggalkan apa-apa harta atau keluarga atau kawan yang mempunyai kemampuan untuk membayar fi dan caj tersebut, meremitkan keseluruhan atau sebahagian daripada fi dan caj tersebut.

Kuasa pegawai polis di bawah Undang-Undang Kecil ini

19. Tiada apa-apa jua yang terkandung dalam Undang-Undang Kecil ini boleh mengurangkan kuasa seseorang pegawai polis untuk menyiasat apa-apa kesalahan di bawah Undang-Undang Kecil ini.

Pemansuhan dan peruntukan peralihan

20. (1) Undang-Undang Kecil Tanah Perkuburan Islam (Majlis Perbandaran Petaling Jaya) 2000 [Sel. P.U. 30] adalah dibatalkan.

(2) Apa-apa notis, perintah, kompaun, lesen atau dokumen yang dibuat atau dikeluarkan di bawah Undang-Undang Kecil yang dibatalkan hendaklah disifatkan telah dibuat atau dikeluarkan di bawah Undang-Undang Kecil ini dan hendaklah terus berkuat kuasa sehingga dibatalkan.

Dibuat oleh Majlis Perbandaran Petaling Jaya dalam mesyuaratnya pada 29 September 2005.
[PU. Sel. Am 0283]

DATO' AHMAD TERMIZI BIN HAJI PUTEH
Yang Dipertua,
Majlis Perbandaran Petaling Jaya

Disahkan oleh Pihak Berkuasa Negeri dalam mesyuaratnya pada 20 Disember 2005.

BAKHTIAR BIN HUSSIN
Setiausaha,
Majlis Mesyuarat Kerajaan,
Selangor